

223914

卷
施
閣
集

中華書局印行



卷施閣集

410055

《四部備要》

集部

上海中華書局據北江遺
書本校刊

桐鄉 陸費達 總勘

杭縣 高時顯 輯校

杭縣 吳汝霖 校
丁輔之 監造

版權所有不許翻印

洪北江先生年譜

門人旌德呂培等同編次

先生姓洪氏諱亮吉字君直一字稚存號北江晚號更生行一江蘇常州府陽湖縣左廂花橋里人先世本居歙縣洪坑系出唐宜歙觀察使經綸始避唐敬宗諱改宏氏爲洪氏三十六世至先生高祖千運府君諱德健國子監生封中憲大夫娶程恭人生子二長爲先生曾祖秋山府君諱璟康熙戊寅拔貢生山西大同知府崇祀交城大同各宦祠娶汪恭人歙國子監生世昌女繼娶徐恭人歙處士成教女生子十一次爲先生祖封旅府君諱公案國子監生考授直隸州同知馳贈承德郎饗於常州趙氏遂遷居焉娶趙安人武進戶部尚書諱恭毅申喬孫女翰林院侍讀熊詔女生子五次爲先生父午峯府君諱翹國子監生累贈奉直大夫娶蔣太宜人武進歲貢生封奉政大夫金聲孫女雲南嶧峨知縣數淳女生先生兄第二人

乾隆十一年丙寅先生一歲以九月初三日子時生於常州中河橋東南興隆里賃宅中宅後有積水池先生生於池南西舍

十二年丁卯先生二歲

十三年戊辰先生三歲

十四年己巳先生四歲午峯府君命先生伯姊課之識字先生每字必詢其義日晚皆爲蔣太宜人述之是年凡識七八百字

十五年庚午先生五歲在家塾從季父希李先生授禮記大學中庸兩篇正月八日仲第孺吉生

按先生從父四人長諱翰字翮飛行一國子監生未婚卒次即午峯府君次諱翔字雲上行二次諱翹字君佐行四國子監生贈修職郎次諱朝字希李行六先生仲第字赤存行二

十六年辛未先生六歲在家塾授論語七月二十日午峯府君客鎮

洋縣署得疾歸未至家五十里以廿四日申時卒於落社舟次越日殯於城東天寧寺華房先生隨蔣太宜人暨三姊一弟守殯宮凡五十日始歸

十七年壬申先生十歲以午峯府君卒貧無所依隨蔣太宜人及姊弟寄居外家外王母龔太孺人之意也時外家亦寄蔣太宜人率諸女勤女工自給并儲修脯俾先生就外家塾受經率夜四鼓方就寢事詳機聲燈影圖記及南樓憶舊詩是歲塾師爲莊觀五先生城西坂上鄉人同學則其子辭剛表兄肇新廷耀龔凡四人讀論語畢

十八年癸酉先生八歲在外家塾從惲牧菴先生銘受孟子惲先生武進縣學附生惲先生幼孤而慧常分館餐食之後其孫與三以乾隆甲午科舉順天鄉試爲先生同歲生惲先生猶及見之

十九年甲戌先生九歲在外家塾從黃敬菴先生朝俊受孟子及毛詩國風黃先生武進縣學增生課讀極嚴是秋先生適楊氏從母亦以塾居貧苦無依率二女微從兄啓宸後樓以居與外家相近移舍日值先生讀孟子既醉以酒一章解塾諸其處龔太孺人及蔣太宜人適在坐因舉宜其室家句命之屬對即應聲曰飽乎仁義龔太孺人極賞之自此益鍾愛焉是歲表第定熙亦入塾與先生年相若後卒於叔素園先生官舍先生有詩哭之

按先生舅氏三人長名樹誠字實君國子監生贈登仕郎次名琦字素園乾隆甲子舉人江西德興知縣皆蔣太宜人兄次名衛字曙齋乾隆壬午科副榜貢生 賜檢討銜世嗣世父淮安教授文元後爲蔣太宜人弟事皆詳先生所撰外家記聞一卷處士肇新少府廷耀上舍龔處士定熙奎耀皆實君先生子蔣太宜人之姪先生之配蔣宜人兄弟也

二十年乙亥先生十歲在外家塾從黃先生受毛詩畢

二十一年丙子先生十一歲將太宜人率先生歸興隆里舊宅從旁

舍塾師受尚書同學生徒十餘人不能備課每篇音訓誦者恆至

十數日夕歸將太宜人令之背誦必爲泣而正焉如濟河惟兗州

克讀作褒之類九月八日叔父君佐先生卒於廣西百色廳寓舍

無子以仲弟爲之後十二月伯姊適城北前橋村芮處士光照

二十二年丁丑先生十二歲從周線里岳介錫先生受禮記是冬舅

氏素園先生以國史館錄錄敘選授江西德興知縣迎養龔

太孺人於官舍自此將太宜人益貧苦無所依

二十三年戊寅先生十三歲仍就外家從表兄肇新受禮記及周易

塾課畢先生始學作詩嘗作中秋卽景詩有月出百尺樓花香三

重開之句不敢示人惟以示表第定熙冬十月舅氏寶君先生卒

於德興官舍表兄肇新奔喪西上因從陳襄實先生寶讀書先是

丙子科陳先生赴江寧鄉試舟覆於江午峯府君往館世執津浦

蔡太守觀瀾江寧官署塗次遇之急募舟以拯并助館金一笏爲

試費陳後以己卯舉於鄉與先生亦中表兄弟也課徒之暇喜錄

唐宋詩餘于是先生亦學作小令并與表兄肇日課漢魏六朝三

唐詩成誦乃已是月仲姊適同里汪上舍德濱

二十四年己卯先生十四歲在鹿苑菴從董獻策先生舒傳授春秋

左傳并學作制舉文半篇董先生常州府學附生同學十數人惟

與楊布衣毓舒交最密暇卽唱酬往還歲作詩數十篇及斥釋

氏文一首

二十五年庚辰先生十五歲在西廟謝氏塾從唐麟臣先生爲垣

受左傳及史記漢書雜文唐先生武進縣學附生工詩三月上已

先生始作制舉文全篇題爲則以學文一句文成後唐先生極賞

之同學爲謝孝廉榕上舍振祺等四人孝廉與先生極契後中乾

隆戊申科順天榜舉人是歲先生有附執羅兒諸詩及送表第定

熙至江西官署詩集中始有存稿

二十六年辛巳先生十六歲從交浦里繆映葵先生謙受唐宋雜文

及制舉義繆先生江陰縣學廩生同學爲陸上舍煨布衣文在張

布衣先甲兄弟凡十餘人三月初應童子試不售

二十七年壬午先生十七歲在百花樓巷莊氏塾從金壇荆廷緯先

生汝翼受公羊穀梁及制舉義荆先生金壇縣學廩生先生從表

姊子長於先生八歲舉業最工因是始識作文法荆先生後以是

科副榜貢生中順天癸卯舉人已西進士官華亭教諭卒是歲同

學爲莊上舍遠兄第二人始學作古文有祭花神文及園居南樓

夜宿初生十五大等詩初與唐上舍聯訂交間有唱和焉

二十八年癸未先生十八歲在城北四十里郵村鄒翁元士家塾仍

從唐麟臣先生習制舉義同學爲鄒福梅廷梅金川三人鄒翁極

重先生欲以女妻之知有所聘乃止五月解館歸卽染時疾復延

及全家將太宜人病瀕危者數次大母趙安人大父封旅府君卽

於是月相繼卒先生承重居廬至匝月後病稍瘳八月初復赴鄒

氏塾是秋舅氏素園先生罷官奉龔太孺人旋里先生解塾卽從

蔣太宜人仍居外家與表兄肇從表兄定安尤契倡酬談讌每徹

晨夕郭北篇中并鄉歌諸詩皆是年作也

二十九年甲申先生十九歲從北後街余芭貽先生豐受唐宋古文

及制舉義余先生常州府學附生奇賞先生有異才之目每課文

日先生常兼作數篇或一題卽製其二其三午餘諸同學方構思

未就輒已交卷時蒙擊節嘆賞歲暮解塾獨爲詩送先生次卽賞

楊生清輪後楊成乾隆甲辰進士里中皆謂余先生有知人之鑒

焉是歲同學爲余先生子明經形及楊章泰畢諸生共十餘人有

雲齡春詞獨酌諸詩始學爲駢體文

三十年乙酉先生二十歲在外家團鳳書屋授表第兆岫經素園先

歲得脩脯錢二千八百暇即從舅氏疇齋先生問業時表兄馨從表兄定安皆授徒於家三人所夕往還無間有春園唱和集又與里中諸名士結社訂交始廣有題阿房宮圖諸詩填詞四十餘首三十一年丙戌先生二十一歲仍在外家授徒從學則表第兆响從表第榮秀君于衡章齊川子三人歲入脩脯錢七千正月二十五日叔父雲上先生卒六月應童子試不售是歲詩社以洗研池賦檳榔行雲谿竹枝詞命題先生試列第一又在楊氏騰光館會課凡四十人皆里中名宿先生年最少從舅氏榕齋先生閱其文奇賞之亦列爲第一此後先生常詣舍南竹屋問字至辛卯秋客皖江乃已又賦中秋減字木蘭花詞十首同輩傳鈔殆徧劉文學宸贈詩云才子清眠起夜分新詞字字鏤香雲何當共握琉璃管寫盡羊欣白練裙是歲詩詞約及百首

按雲上先生四子長開吉字元惜爲先生從兄次顯吉字尙儀次亘吉字禹平次良吉字元良皆先生從弟將榕齋先生名和寧乾隆壬申進士由翰林院編修改官湖廣道監察御史

三十二年丁亥先生二十二歲適汪氏仲姊以先生制義不進因與將太宜人謀復令先生在張王廟西潘氏塾從時月圃先生元福受作文法束脩二十千皆仲姊獨任之時先生乾隆壬申舉人中甲戌明通榜工帖括同學則潘上舍尙基方上舍起莘青陽陳上舍蔚江陰陳秀才宏器諸人尙基之叔振煥亦舊識也六月應童子試不售七月諸同學就江寧鄉試先生又獻鹿苑菴後雲依閣讀書每夜輒至三鼓僮僕之託言有賃宅者遷先生入菴旁土室中上漏下濕居之晏然冬十月外王母舅太孺人病劇先生自塾中歸侍疾衣不解帶者旬日及卒慟哭嘔血七七竟始奉將太宜人歸與隆里舊宅是歲有南樓贈書圖記訪從叔縣尉至昆山紀游哭外王母諸雜體詩

三十三年戊子先生二十三歲在仲姊宅授汪甥楷經汪氏居天井里室宇深邃宅中所延經師則同里段布衣聖烈李布衣瑞寬與先生爲三其羣從皆好賓客每有文藝三人者恆首坐焉九月十六日將宜人來歸先生贅於外家凡三日始同歸與隆里舊宅宜人將太宜人兄實君先生女也婚甫五日即赴弔邵先生齊齋於常熟邵先生乾隆壬戌翰林主常州龍城書院奇賞先生與黃君景仁是歲有催粧詞哭邵先生及游虞山詩又有寓興詩二十首及東鄰華婦等詩寓興詩後即失去

三十四年己丑先生二十四歲仍館汪氏正月叔姊適同里史君德季五月應童子試補陽湖縣學附生七月與諸同人訪城西徐墅陳刺史明善於亦園與無錫邵秀才辰煥江陰屠進士紳同里劉文學駿中表莊上舍寶書趙上舍懷玉唱和詩極多是月長女傳篇生未幾殤有贈趙表第七言長歌

按先生少孤午峯府君未及命名初名蓮字華峯是年以縣試第二府試第三院試第八補縣學生督學則副都御史滿洲景福也後以壬辰年改名禮吉辛丑年就試禮部以嫌名嘗有所避復改今名莊爲先生從母之子後官聊城縣丞趙爲先生祖母兄兩浙鹽運道同教之孫後以庚子 召試舉人官內閣中書青州府同知

三十五年庚寅先生二十五歲仍館汪氏從學者甥楷及汪生植等三人七月僧黃君景仁附瓜船至江寧鄉試九月榜發薦而不售有游京口三山及江寧雜詩是秋識錢唐袁大令枚於江寧大令謂先生詩有奇氣逢人輒誦之始與里中董太守思嗣左刺史輔訂交

三十六年辛卯先生二十六歲仍館汪氏從學者汪董諸生等四人五月僧趙表第懷玉赴江陰同寓趙孝廉教業寓齋科試一等四

名補增廣生七月十日次女傳綫生越歲春即痘殤備楊秀才繼曾炳文劉上舍培基赴江寧鄉試同寓秦淮河房九月榜發不售十一月先生以館穀不足養親買舟至安徽太平府謁朱學使筠時學使尚未抵任沈太守業富素重先生留入府署未匝月適安徽道俞君成欲延書記太守以先生應聘已至蕪湖有留上朱學使書學使得之甚喜以爲文似漢魏即專使相延入幕以臘月八日復抵太平黃君景仁已先在署學使作書備致同朝謂甫到江南即得黃二生其才如龍泉太阿皆萬人敵云是年秋在江寧與汪明經中顯進士九苞訂交及入學使署又與邵進士晉涵高孝廉文照王孝廉念孫章孝廉學誠吳秀才蘭庭交最密由是識解益進始從事諸經正義及說文玉篇每夕至三鼓方就寢是年所作詩文逾百篇

三十七年壬辰先生二十七歲在安徽學使署隨歷徽州寧國池州安慶廬州鳳陽七府六安一州徧游采石青山敬亭黃山齊雲齊山諸名勝六月以歸省旋里七月仍赴太平十一月以兩世六棺未舉歸奉先生祖父母及午峯府君叔父雲上君佐兩先生叔母趙孺人榷葬於城北前橋村新塋是冬以所負多訪蔣編修士銓汪孝廉端光於揚州編修解囊金助之乃得歸已迫除夜矣是歲作文二十餘篇詩二百餘首

三十八年癸巳先生二十八歲時四庫館始開江浙採遺書安徽省設局太平聘先生總司其事沈太守業富并延兼管書記閏三月十六日長子鈞孫生七月朱學使以閱卷乏人復延先生偕試徽寧二府九月自徽州偕汪孝廉端光歸里由新安江徧遊嚴陵富春及錢唐山水諸勝唱和幾及百首十月先生以不能家食往謁胡按察季堂於蘇州因訪趙表第懷玉於宮墜同游東西兩洞庭入林屋洞探金庭玉柱之勝宿包山寺一夕記游詩約十餘首

月杪復歸時錢文敏公維城居憂在里見先生詩文奇之徒步過訪焉是冬移居白馬三司徒里賃宅十二月聞朱學使離任入都因附江陰繆君晉階赴廣西便舸至太平送之繆君爲先生舅氏素圖先生督時還來賓縣界歸司貧不能歸沈太守業富袁大令枚皆薄助行資於歲除日騎驢抵里有感族人饋新炭詩作兩首南北史樂府二卷三十九年甲午先生二十九歲正月赴江陰補壬辰年歲試先是錢文敏公會語學使彭閣學元瑞謂先生爲昌黎復生由是閣學亦久知先生十三日補試準附一等三名後又次蔣編修士銓元韻贈先生七古一篇薦入常鎮通道袁君鑒署授徒歲修百二十金并令在揚州安定書院肄業膏火費亦及百金自此將母稍裕七月僧黃君景仁赴江寧鄉試同寓明徐氏東園舊址是科閣中得文及五策已定作元房師賈先生景誼蘇州府同知以首藝有別解與兩主司力爭因定作副榜第一焉座師則翰林院侍讀學士今文華殿大學士董公誥司經局洗馬今兵部尚書劉公權之也榜發座師及學使皆惋嘆不置十月復詣揚州冬杪始歸偕汪孝廉端光唱和詩極多是歲始與孫君星衍訂交同里則孫黃趙諸君外復偕楊君倫呂君星垣徐君書受唱酬無間里中號爲七子

四十年乙未先生三十歲彭閣學薦入江寧陶太守易署中修校李鐸尚史匝月事竣太守亦重先生因延課其孫兼管書記四月以太守俸滿入都因歸省親七月復至江寧九月太守擢惠潮嘉兵備道先生以親老不能遠游因就句容林大令光照聘課其壻漳浦鄭秀才聯華時孫君星衍尊人孝廉勳官句容教諭而訓導全椒朱君沛縣丞錢唐汪君蒼霖皆工詩愛客縣中紳士王廣文吉士兄弟沈公子衣言亦慕與先生交凡客句容三月文譙殆無虛日又徧游茅山樓霞紀游詩約數十篇臘杪始歸里門十二月十

日次子盼孫生

四十一年丙申先生三十一歲正月仍至句容縣署二月歸里旋至揚州及江寧訪友三月復往句容校縣試文四月以林大令罷任歸里時浙江學使王公杰欲延先生校文七月往謁學使於紹興值其屆試例不當通刺資斧幾至之絕及試畢往謁學使一見先生如舊相識遂偕往試台州處州二府中途歷天台雁蕩諸勝皆有詩紀事十月二十六日將太宜人在里猝得中風疾卒春秋六十有三仲弟以先生在千里外恐得計後驚悼有他變即作札言太宜人病狀屬妙壻史君德孚持至處州并促偕歸到日亦直肩試留書而返先生於試畢得書星夜遄返十一月十四日晡時舟至戚墅堰距常州三十里疾步至城有僕窺園父仇三爲營卒途遇之問家中狀仇以實告先生驟聞哀耗五內昏迷方度八字橋忽失足墮水兩岸陡削人不及救隨流至滕公橋有汲者見髮颺水上攬之得人試心口尚微溫始呼衆集救問里中識者共昇至家救者不知先生疑爲避債赴水及審狀則皆曰孝子孝子悲嘆而散天嚴寒衣履冰濕鄰人蔣松園釋先生衣自解衣衣之舉家號哭呼救久之方蘇搶呼痛哭幾不欲生水漿不入口者五日諸姊以大義責先生始稍進米飲七十內僅啜粥粥席蓆枕由晝夜號哭終喪不進肉食不入內室所服皆白衣冠不御縐布自以未及待將太宜人含斂哀感終身嗣後每遇忌日輒終日不食客中途次不變三十年如一日是歲在苦次撰次將太宜人行述

四十二年丁酉先生三十二年居憂在里授徒從學者汪甥楷劉生登禾孫生星衡瑞及張楊諸生凡七人長子飴孫時已五歲亦日課以爾雅十數行十一月座師劉公權之視學安徽遣人相延先生亦以營葬乏資遂於長至前由陸程赴太平并約孫君星衍偕行劉公相待有加以先生衣綸素不肯更易因約值節日朔望皆

聽獨處專遣人司飲食在學署一載率以爲常又因先生譽孫君學行因并款留以助衡校自是先生與孫君助學使校文外共爲三禮訓詁之學留太平度歲

四十三年戊戌先生三十三歲在安徽學使署二月隨試太平徽州寧國池州四府五月中始返太平偕孫君至句容學署度夏七月復同詣太平隨試江北諸州府十一月在滁州因葬事先歸以十一月廿六日附葬蔣太宜人於午峯府君墓知友在百里以內者咸來會葬如高郵金君蘭無錫楊君芳燦兄弟及同里孫君等皆館於白馬三司徒里賃宅旬日方去先生在冢次三日夜負土成墳始歸歲暮以負債多偕孫君至句容聞座師劉公遭母憂復親詣太平弔唁至除夕前仍回句容

四十四年乙亥先生三十四歲仲弟以少孤失學假仲姊資學爲買果歲虧折資本至無以償時先生服闋歸里決計攜弟北上別謀進取又以無行資袁觀察鑒薦入常州黃太守澤定署閩府試文薄有所贈方得成行過揚州汪孝廉端光復助以行資始舍舟從陸道遇漢軍總秀才公儼今名恩聯車北行五月初二日抵都居黃君景仁寓齋時四庫館甫開離校事繁座師董公誥爲總裁官屬總校江寧孫舍人溶延先生至打磨廠寓齋總司其事歲脩二百金仲弟亦送入方略館効力先生節齋所入半給仲弟館費以半寄歸爲衣食之資迎養叔母余孺人季父希李先生於家用度益窘每遇訪友或假書十里五里無不步行八月應順天鄉試不售時翁學士方綱將編修士銓程吏部晉芳周編修厚輿吳編修錫麒張舍人垣共結詩社首邀先生及黃君入會每一篇出人爭傳之是以先生遇雖甚困而友朋之樂以此二年爲最九月朔日女紡孫生是年得駢體文四十首詩詞約二百篇

四十五年庚子先生三十五歲在孫舍人寓校書仲弟以思家得略

血疾新歲益甚先生質衣具資遣人送歸時甫近上元以無衣不克出門託疾斷慶弔絕過從者凡兩月時方

南巡諸臣例獻賦頌先生爲山陰梁尚書國治製頌十八章首邀

譽賞于是都下求屬稿者甚衆先生亦精力絕人日爲孫舍人校官

書八巨冊類有攷證數十條夜則製進呈冊頁一通每至三鼓方

休是年恭遇

萬壽頌述之文益多自二月至七月所製凡五六十篇得酬金四百

兩時前橋新塋前地一畝欲爲豪家佔買先生得家問即以所得

金之半寄歸先與立券豪家遂不能奪仲弟病痊後復假貸北來

先生爲盡償宿逋并取還前典質之物類皆賣文錢也八月應順

天鄉試出闈即爲四川查按察禮聘掌書記入蜀歲修四百金先

生以屢困場屋不復有進取心九月朔遂辭孫舍人暫寓蓮花寺

待查公同行適其方擢四川布政使未即就道初七日揭曉中式

第五十七名舉人孫舍人同獲雋查公遂力止先生無行于是復

遷寓舍人宅是科座師爲協辦大學士漳浦蔡文恭公新刑部左

侍郎無錫杜公玉林內閣學士滿洲嵩貴公房師爲掌貴州道監

察御史清苑李公孔陽李公閱薦首場即得疾二場屬吳江丁郎

中雲錦代閱三場屬嘉定曹中允仁虎代閱座師以制藝皆散體

已定作副榜第一矣忽中允得五策以爲顧事林復生蔡文恭公

取閱亦深賞之遂移入前列以五策進 呈揭曉後未一月房

師即以疾逝先生與同門生視含斂并稱贊而厚贈之是歲與黃

君及欽州馮編修敏昌順德張解元錦芳唱和及詩社所作共得

詩百餘篇雜文數十篇著三國量城志二卷

四十六年辛丑先生三十六歲在孫舍人寓校書時移寓買二月應

禮部試本房山陰王編修增閱卷呈薦閣中已定作江南第二本

矣固始吳副憲玉綸爲副總裁旋以軍機中書汪君學金卷易之

先是孫君星衍已入關并札言陝西巡撫畢公沅欽慕之意先生

遂決意游秦四月十六日偕崔同年景儀西行力至四時征逆

回京兵入陝道出山西因迂道由館陶臨清至河洛抵開封而賓

客已竭適舊友楊司務仁基同年管戶部世銘皆在開封共假資

以行五月望後抵西安寓開元寺一宿畢公聞先生來倒屣以迎

期日遂延入節署時幕中爲長洲吳舍人泰來江寧嚴侍讀長明

嘉定錢州判站及孫君與先生凡五人陝西尚有回警日偕畢公

籌兵畫餉暇即分韻賦詩常至丙夜間游牛頭香積諸寺尋曲江

及漢唐古跡又代莊州判折修延安府志歲杪方竣是月二十五

日適汪氏仲姊以疾卒先生聞訃哭之慟仲弟以尙未議敘留都

每月揭資寄之是年道中懷古紀游及唱和詩共得二百首雜文

數十篇

四十七年壬寅先生三十七歲在西安節署三月偕同人至牛頭寺

看桃花抵終南山麓始返四月黃君景仁以將赴選謀資入秦寓

開元寺者三月間旬必偕孫君出訪之或同游各勝竟日而還六

月至朝邑訪莊大令祈回塗過潼關赴陸司馬維垣之約時陸署

府其子戶部鍾爲留二日即順道游華山宿玉泉院質明坐竹兜

行二十里至青柯坪久憩皆當步行遂自千尺幢直上小駐媼神

洞飲泉由仙人空日月崖蒼龍嶺至三天門塗皆危絕攀鐵索穿

石脅方得上先生步行若飛餘人不能及也從天門東折詣玉女

峯坐洗頭盆側蒼柏滿崖夕陽欲下天風冷冷渺非人境復上謁

金天宮宮在落雁峯下距峯頂尚五里道士供果餌畢因至後山

松檜亭視新月亭址即秦昭王與天神博處時七月哉生魄日也

薄暝仍回金天宮蔬食後出屋視星斗皆大於瓜皎潔異常倦宿

東軒徹夜有聲不絕蓋呼吸可通帝坐矣四鼓招道童秉炬上落

雁峯視日出峯頂僅十餘步左爲華池右則鐵屋一間祀老子時

夜尙昏黑忽閃電自隔河來八百里中條山畢見久之海日始上霞光萬千較黃山仙掌峯所見又不同矣躡久下嶺天尙昏黑無所見復乘炬西至蓮花峯視巨壑壁山處又南折至環翠巖望山南諸峯并訪陳希夷習靜石屋徑從原路下山未刻至玉泉院華陰知縣來訪足力已竭幾不能具禮兩日後始復舊以初八日返節署九月舊友湯大令大奎以輪鉤至甘肅過陝相訪并出夜研瑣談屬爲點定是歲凡得詩百餘首文二十餘篇著漢魏音四卷撰淳化長武二縣志

四十八年癸卯先生三十八歲在西安節署三月莊公子達吉約游鄜縣人折方因同由興平抵馬嵬驛夜宿各有題壁詩留鄜縣五日登太白山從新開路至上池一勾久憩別日復上五丈原望陳倉岐山回塗過盤屋偏訪仙游樓觀諸勝時太倉王上舍開沃主講塾屋因留宿書院中二日由鄜縣歸西安五月得黃君景仁安邑臨終遺札以身後事相屬先生由西安假驛騎四晝夜馳七百里抵安邑哭之于蕭寺中爲措資送其柩歸里時季父希李先生留滯漢口約先生同歸先生遂自蒲州渡河由襄陽至漢陽而季父已先行座師杜公方鞠獄武昌喜先生至邀留旬日陪遊黃鶴樓西塞山及隔江大別梅子諸山至七月望夜方行八月朔日抵里門因爲黃君營葬先是畢公知所居賃宅逼隘因贈資爲購宅即今花橋北居第也以十月初三日移居焉十二月偕陸同年壽昌趙表第懷玉計偕北上復迂道至句容江寧乃克成行時將南巡車馬皆乏僱小車前行除夕住拈花集度歲是歲紀游詩百餘首澄城縣志二十卷

四十九年甲辰先生三十九歲正月十八日抵都門二月偕江陰繆孝廉汝和寓抱子河觀音寺時已歸兒女姻其三月應禮部會試試畢偕同人游西山棲發薦而不售本房編修祥慶公閱卷最遲

至四月四日方以三場並薦總裁蔡文恭公及紀公昀奇賞之紀公尤擊節五策必欲置第一時內監試費潤鄭侍御徵以得卷遲疑之欲移置四十名外紀公堅執不允因相與忿言不可解總裁胡公高望調停其事遂置不錄紀公於卷末賦惜春詞寄意出閣即先詣寓齋相訪焉先生以四月出都由山西赴陝道中爲田家詩寓意以資斧告匱迂道訪沈運使業富于運城五月半抵潼關聞畢公祈兩太白山因至盤屋仙遊寺相見垺日同游樓觀半道聞甘肅回警畢公即回西安調撥兵餉先生以病暑留塾屋縣署旬日方返西安莊公子達吉繪元都訪古圖有百韻詩紀事是月十九日第三子符孫生時西安修濬城隍未竟而西事頗急畢公屬先生及孫君時假出游爲名規畫其事六月程編修曾芳乞假來陝抵署即病不起畢公與先生等日爲營畫醫藥及沒皆躬視含斂是歲著公羊穀梁古義二卷詩文合百餘首

五十年乙巳先生四十歲在西安節署正月畢公入觀并摩唐開成石經進呈擬薦先生孫君及吳縣江布衣聲書國朝三體石經即在西安刻石以進爲當軸者所阻而止二月偕嚴侍讀長明游紫閣白閣圭峯草堂寺由產水橋巡第五橋諸舊蹟時畢公調撫河南趣先生至開封遂於月杪由陝入汴至則豫省方積旱又河工事填委不復有關中唱酬之樂矣五月十一日季父希李先生卒十一月自豫南回枉道至固始謝大令聘署齋盤桓旬日方還里門仲弟以議敘從九品需次省先生於開封先生致書曹州守太谷吳君署俾就近食力焉後以史氏甥女後歲數甚復節齋衣食贈諸親友間亦與錢大令維喬將太守熊昌諸人爲銷寒小集是歲得紀游詩百首修固始縣志

按希李先生二子長名原吉字思周次名炳吉皆先生從弟五十一年丙午先生四十一歲在里中二月偕錢大令維喬等買舟

至浙江省從舅氏榕齋先生時舅氏曙齋先生父于楊孝廉夢符孫振學吳祖健將承會陸繼會四上舍並以事至杭崔浣青恭人暨公子景侃亦往任所連舫十數徧游錫山虎溪復至元墓觀嚴流連篇什繼以清歌極琴聲游覽之樂抵錢塘日即居將表弟重耀寓齋榕齋先生間日游龍井天竺靈隱淨慈諸名勝與邵編修晉涵楊孝廉蔣上舍崔公子吟咏常至徹夜留月餘復歸里中三月重赴開封節署八月登封陸大令繼專延修縣志并約爲嵩山之游以十月由鄭州密縣抵登封陟太室少室訪嵩陽書院暨啓母石手搦三石闕銘信宿少林寺乃回南抵開封聞榕齋先生之訃哭之慟是歲南北紀游詩約百五十首著東晉十六國量域志修登封縣志爲友人改纂懷慶府志

五十二年丁未先生四十二歲正月偕孫君星衍計偕北上入都寓繩匠胡同三月應禮部會試榜發不售以五月初抵里時競渡方盛與莊表兄寶書陳大令賓陸廣文書昌日爲泛舟之游五月攜卷施閣于宅西稍有樹石及小池日偃仰其中畢公屢書促行十一月偕莊舍人復旦重赴開封節署是歲得詩二百首撰乾隆府廳州縣圖志

五十三年戊申先生四十三歲在開封節署賦寒食紀游詩四十首和者數十人八月畢公擢督兩湖先生偕行以九月五日抵武昌節署時楊進士倫亦主講于此時與出游晴川黃鶴諸勝唱和甚多歲暮畢公甫自荊州堤工回署汪明經中毛州判大瀛方上舍正樹章進士學誠亦先後抵署談燕之雅不減關中

五十四歲己酉先生四十四歲正月二日計偕北行毛州判大瀛錢先生於江北三山徑梅已半開矣由漢陽北上元夕後抵開封居同年徐大令書受寓齋數日渡河至武陟訪王大令復不遇因獨游濟源謁濟瀆廟至盤谷欲往王屋山不果二月抵都居孫君星

衍琉璃廠寓齋三月應禮部會試榜發不售五月八日抵里七月之杭州訪友留旬餘乃歸八月仲弟選授崇文門副使時同年李太守廷敬官常州延修府志并選唐百家詩以九月進署十二月返舍與錢大令維喬莊公子遠吉爲消寒小集是歲得詩六十餘首

五十五年庚戌先生四十五歲正月元夕趁山東使船計偕入都至王家營以船行甚遲復由陸取道泰安登泰山至高老橋日已暝暮欲逕上同伴不可乃還以二月杪抵都居仲弟海岱門三條胡同寓齋三月應禮部會試四月初九日榜發獲雋座師爲東閣大學士王文端公杰吏部侍郎後官體仁閣大學士朱文正公珪工部侍郎鄒公奕孝房師爲刑部員外郎後官安襄鄖道王公奉會也先是朱文正公雖未識面然知先生名已久入關後欲暗中摸索得先生作第一人及得李君廣芸卷有駁策問數條以爲先生擬第一復得朱君文翰卷用古文奇字又以爲先生遂置李君卷第六而以朱君冠多士及拆號而先生名在第二十六乃相與嘆息以爲各次亦有定數云 殿試先生卷條對詳明讀卷大臣進呈第一

欽定第一甲第二名五月初一日引

見授職翰林院編修七月派充 國史館纂修官是秋先生與仲弟移寓三里河清化寺街饒有竹木之勝查給事瑩舊宅也歲除先生以通負多避債至城東數日除夕抵暮乃歸是歲偕同年張太史陶陶唱酬甚多所得詩文數十首

五十六年辛亥先生四十六歲在京供職正月十六日長子鮑孫娶婦汪氏仲姊季女也四月將宜人率眷屬由水路抵都十月石經館開派充收掌及詳覆官時至國子監監視刻石以蔣衡所書十三經字多譌俗有上石經館總裁書欲一一更正不能從也是歲

儲法學士式善劉檢討錫五伊刑部秉綬何工部道生王孝廉芭
孫唱酬甚多

五十七年壬子先生四十七歲在京供職三月考差引見蒙

記名八月充順天鄉試同考官十四日又在闈中奉視學貴州之
命向例未散館翰林無爲學政者有之自先生及同年石修撰韞玉
始蓋異數也九月榜發得士董履坦等十三人副榜希齡等二人
卽日至海淀

御園謝

恩兼請

聖訓卽蒙

召見

垂詢鄉貫科第甚悉并

命速赴新任先生退卽束裝十六日次子盼孫騶二十四日舉家上
道十月半抵樊城眷屬暨賓友由水程進發先生馳驛先行十一
月十三日抵黃陽巡撫撫署馮公光熊等皆出郭相迓十五日接
印任事卽緘題觀風十三府一廳所屬生童以衙署逼窄捐貲擴
署後樓閣卽今聽事西紅香館聽雨蓬曉讀書齋千葉蓮臺等是
也十二月初三日眷屬抵署從子繩孫徐悼孫史甥超宗並隨署讀
書延表姪蔣上舍維垣教之從弟顧吉原吉再從姪建永蔣表弟
曜西汪甥楷屠甥景儀及桂陽李秀才萬坤先後至署佐理閱文
及幕中雜事是歲得詩七十餘首

五十八年癸丑先生四十八歲在貴州任二月出巡上游歲試安順
南籠大定遵義四府五月回署六月歲試貴陽府八月出巡下游
歲試平越思南石阡鎮遠思州銅仁六府十一月回署先生每課
士皆終日坐堂皇評閱試卷積弊悉除又歷試諸府皆拔其尤者

年

譜

送入貴陽書院肄業一歲捐廉俸數百金助諸生膏火又購經史
足本及文選通典諸書俾資誦誦其在省日每月必自課之令高
等諸生進署講讀詩文娓娓不倦款以飲饌焚之銀兩由是黔中
人士皆知勵學好古甲寅乙卯兩科書院諸生中式者至五十餘
人內如胡吏部萬清花給諫木黃大令鶴何編修應杰張工部本
枝邱編修煌耀編修錦觀徐進士時英蘇大令廷榮焦進士承燁
劉進士煜兄弟賀進士世清等連翩擢第餘皆領鄉薦及登拔萃
科以去五六年間所識拔之士無仍爲諸生者是歲具摺奏請以
禮記鄭康成注易陳灝奉

旨交部議奏爲部臣所格不行凡得紀游詩及雜文共百五十首著
意言二十篇

五十九年甲寅先生四十九歲在貴州任二月出巡下游歲試都勻
黎平二府都勻試畢陸行至三脚里由都江舟行古之牂柯江也
至古州復登陸時彭提督廷棟兼攝古州總兵與孫司馬鑑出迓
邀游五榕山入諸葛洞時方仲春百卉齊放葉甲花黃及一二十
里先生嘗云江南無此春景也留一日始行沿路苗寨中皆合隊
出迎男吹蘆笙衣錦衣插雉尾女則衣黑襖袖以銀圈飾頸富者
至一二十圍晚至館驛必東西列亭下唱歌以荷包及銀犒之方
去黎平以歲科並試留四十日乃行中途歷游南泉山少寨洞獅
子崖諸勝奇麗皆目所未睹先生並有游紀三四五月科試鎮遠
思州銅仁思南石阡平越都勻七府五月十四日返署先一日長
孫數會生八月值甲寅

恩科錄送士子入闈九月科試上游安順南籠二府十一月回署是
歲所得詩文百餘篇著釋歲釋舟二篇

六十年乙卯先生五十歲在貴州任正月十九日布政使以下奉邀
巡撫馮公及先生至城南甲秀樓張燕放燈酒半得銅仁苗石柳

鄧戡官起事耗署按察使張公繼辛貴東道尼堪富什渾公聞信

即行甫曙馮公繼往自此至任滿入都苗氛未清數公並在軍營

時有書函往復頗參規畫焉三月科試大定遵義二府五月回署

六月科試貴陽府八月值乙卯正科錄送士子入闈九月以將報

滿將宜人先率子婦回里十一月十日先生自省城啓行督撫密

摺陳奏聲名以爲清廉愛士數十年所未有諸生送者自圖寧關

至貴定三日中常不絕熊生煥章楊生大奎隨行皆新中式無力

入都者十五日抵鎮遠新任學使談君祖綬亦至當即交印由洪

江進發十二月抵辰州晤湖督畢公沅湖南巡撫姜公晟十九日

抵荊州烟家崔太守龍見以公事出晤崔浣青恭人錢上舍伯垌

兄弟廿四日抵襄陽晤房師安襄鄭道王公孝曾除夕抵河南南

陽府度歲是年得詩數十首著貴州水道攷三卷門下士爲先生

校刊附結軒卷施閣二集

嘉慶元年丙辰先生五十一歲元日偕南陽鎮總兵袁果南陽府知

府完顏岱等至

幄殿行朝賀禮初二日上道初七日至榮澤過河半渡風大作舟幾

覆薄暮仍返南岸因步行攜從子悼孫及兩門生至惠濟橋行館

草宿越一日月夜復渡河夜半忽冰凌大下衝舟至四十里外方

得泊明蚤復至榮陽驛索人夫帆纜始成行午刻抵北岸十四日

抵安陽晤同年趙大令希璜元夕宿磁州廿八日入都廿九日詣

宮門覆

命時先以任滿日黔省督撫保奏過優蒙

諭見面時題奏當日軍機處將原摺先遞旋即

召見

諭問黔中課士情形黔楚苗匪近狀民情安擾官吏賢否甚悉又

垂詢祖父兄弟并甲第師生良久方遣出是年以

皇上登極

恩詔贈先生父承德郎母安人復以本身妻室應得

封典馳贈祖父母如例二月徵兵馬司前街四月散館一等奉

旨留館六月派本衙門撰文七月派充 咸安宮官學總裁八月移

寓沙土園八角琉璃井官房有亭池樹石之勝是歲得詩約百首

二年丁巳先生五十二歲在京供職二月廿四日長孫女生三月初

三日奉

旨在上書房行走侍 皇曾孫奕純讀書即日移寓澄懷園近光樓

下五月

恩賜葛紗官扇香串樂定有差蔣宜人率子婦等抵都八月丁酉朔

皇上釋奠于太學奉

旨偕李編修鈞蘭石修撰韞玉王編修宗誠分獻後殿是日四子昨

孫生其母侍姬鄭氏□□人蔣宜人前以多病爲先生購得之命

隨入都侍巾櫛焉十月仲弟以嗣母余太孺人年邁乞養歸先生

垂淚送之自此亦有歸志矣十二月

恩賜

御書福字風羊鹿尾諸品有差是歲得詩文七十餘首刊東晉壘域

志竣

三年戊午先生五十三歲在京供職元夕後仍遷入澄懷園直廬正

月十二日仲弟副使君卒于里門二月廿七日大考翰詹諸員於

正大光明殿

欽命題爲并辭賦春兩如書詩征邪教疏先生於疏內力陳內外弊

政至數千言情詞剴切閱卷者皆動色初擬二等前列旋置三等

二名三月初二日引

見蒙

高宗純皇帝記名時甫得仲弟凶訃痛哭不食者累日即於初七日

陳情引疾二十五日聖家屬從陸路南回四月二十五日抵里哭仲弟於厝舍五月請蘇州哭畢公沅於其墓七月望日送舅氏曙齋先生暨長子鈞孫至江寧鄉試九月榜發鈞孫中式第四十二名舉人曙齋先生亦以年過八十循例

欽賜舉人十月因長子鈞孫至高淳謁房師張君其縉先生偕至宜興偏游善卷龍池之勝旋即歸里初十日叔母余太孺人卒先生經理喪事踰月不出戶庭十一月至杭州訪阮學使元秦觀察瀛寓西湖漱石居半月而歸十二月葬余太孺人於前橋先塋并卜葬仲弟於塋南計家村是歲得詩文約百首刻十六國量域志竣四年己未先生五十四歲在里門正月爲洞庭包山之游回舟復至香雪海探梅月杪返里二月驚聞

高宗純皇帝升遐以

內廷翰林例應奔赴隨卽束裝北上三月初二日抵都奉

旨

觀德殿隨班哭臨因赴本衙門銷假暫寓同年戴刑部敦元鐵廠寓齋四月派充

實錄館纂修官偕總裁諸公首先訂定條例承纂第一分書卽

高宗純皇帝初登極時事也是月以

高宗純皇帝升祔

太廟

恩詔贈先生父奉直大夫母宜人本身妻室並請

封典如例充己未科會試磨勘官

殿試受卷官五月奉

旨教習己未科庶吉士分課湯君金釗張君惠言黃君慶等十四人

移寓

西華門南池子關帝廟八月第一分

實錄告成先呈

御覽先生以春初束裝匆遽在都車馬衣履一切未具遂于二十日在本衙門乞假已准擬於九月初二日叩送

高宗純皇帝梓宮後南行時川陝餘匪未靖湖北安徽尙率兵防堵時發

諭旨籌餉調兵先生目擊時事屢夕過慮每聞川陝官吏偶言軍營情狀感嘆焦勞或至中宵不寐自以曾蒙

恩遇不當知而不言又以翰林無言事之責不應違例自動章奏因反覆極陳時政數千言於二十四日上書 成親王及座師吏部

尙書朱公珪左都御史劉公權之冀其轉達

聖聽發書後始以原稿示長子鈞孫告以當棄官待罪是日宿宣南坊蓮花寺與知交相別同人皆懼巨測先生議論服食如常二十

五日卽經 成親王等將原書先後進呈奉

旨傳至軍機處指問旋有

旨落職交軍機大臣會同刑部嚴審定擬具奏二十六日王大臣等

在都虞司訊問並面傳

諭旨洪亮吉係讀書人不必動刑先生感激

聖恩伏地痛哭一一如問指陳無隱當經 王大臣等擬以大不敬

律斬立決奉

旨免死發往伊犁交將軍保寧嚴行管束二十七日卽行時事出倉

猝車馬行李俱無所出烟家崔大令景儼方在都門謁選偕同年

王編修蘇同里莊上舍會詒等日夜捫指滿洲侍郎成格公時官

戶部主事耒識先生自以屋券質銀三百兩爲助方得成行計

在刑部三日夜及自刑部至兵部暨出彰儀門慰問者不絕於道

其中多有未經識面者先生一一謝之崔莊二君及同里張庶常

惠言陶孝廉登瀛皆送至蘆溝橋信宿而返二十八日至良鄉道

長子鈴孫旋里支持家事遂挈二僕一車夫以行統計自京師至西安二千六百五十里計程二十六日自西安至蘭州一千六百九十里計程十八日自蘭州至肅州一千四百七十里計程十八日自肅州嘉峪關至伊犁萬一千里計程七十二日先生行篋蕭然資斧屢見匱乏賴故交素識殷勤贈贖餼食解衣給得適行抵成在直隸山西則如李大令景梅蔣刺史榮昌陳大令曰壽在陝西則如朱太守勳莊刺史所費大令濬錢州判站在甘肅則如楊戶部芳燦布政揆姜按察開陽唐大令以增周二尹能珂皆先生素交也十月初八日抵西安重僱車馬留三日乃行十一月初四日抵蘭州十二月初一日抵肅州重僱出關長車除夕在鎮西府度歲事皆詳遣戍伊犁雜記是歲得詩一百四十首自西行以後遵

言不飲酒不賦詩

五年庚申先生五十五歲在伊犁塗次正月二日自鎮西府西行十六日抵烏魯木齊二月初十日抵伊犁惠遠城自八月二十七日起程至是凡行百六十一日始抵戍所先是伊犁將軍保寧妄測

聖意於未到之先先遞奏摺中有該員如蹈故轍即一面正法一面入奏等語奉

硃批此等迂腐之人不必與之計較保公之意始息到日派辦冊房事務并給西城官墅一所先生自抵伊犁除謁見將軍外蹤跡不出戶庭所居環碧軒高柳百株亭榭日軒下谿水四周暇則靜坐攤書間或巡欄閒步而已是年四月 京師亢旱

皇上虔禱

三壇祈求雨澤因

命清理庶獄分別減等又

敕刑部及各省詳查永遠監禁人犯分別省釋其在新疆年久未經釋回者俱分別開單候

旨加恩先生以到戍未及三年例不開列自四月二十四日

皇上親禱 社稷壇之後經旬尚未得雨閏四月初三日因奉

上諭從來聽言爲邦治之本拒諫乃失德之大朕從不敢自作聰明飾非文過採擇羣言折衷而用兼聽並觀惟求一是而已去年編修洪亮吉既有欲言之事不自具摺陳奏轉向成親王及朱珪劉權之私宅呈送原屬違例妄爲經成親王等先後呈進原書朕詳加披閱實無違礙之句仍有愛君之誠惟視朝稍宴小人熒惑等句未免過激令王大臣等詢問擬以重辟施恩改發伊犁然此後言事者日見其少即有言者亦論官吏之常事而於君德民隱休戚相關之實絕無言者豈非因洪亮吉獲咎鉅口不敢復言以至朕不聞過下情復壅爲害甚鉅洪亮吉所論實足啓沃朕心故銘諸座右時常觀覽若實有悖逆亦不能壞法沽名不過違例奔競取巧營私之咎况皆屬子虛何須置辦而勤政遠佞更足警省朕躬今特明白宣諭王大臣并洪亮吉原書使內外諸臣知朕非拒諫飾非之主實爲可與言之君諸臣倖遇可與言之君而不與言大失致君之道負朕求治之苦心矣王大臣看此諭先行迴奏仍各殫心竭思隨時密奏軍機大臣即傳諭伊犁將軍保寧將洪亮吉釋放回籍等因欽此是日午刻皇上硃筆親書

諭旨交軍機頒發中外下午以後同雲密布即得甘霖

御製詩注有納言克己乃爲民請命之大端本日親書諭旨將去年違例上書發往新疆之編修洪亮吉等予釋回宣諭中外并將其原書裝璜成卷常置座右以作良規正在頒發是夜子時甘霖大沛連宵達晝旋據報近郊入土三寸有餘保定一帶亦皆深透

天鑒中誠捷於呼吸可感益可畏也等語是月二十七日先生在伊
輦欽奉

諭旨於將軍署庭涕泣叩首恭謝

聖恩訖即呈明將軍以五月初一日東還統計居伊犁僅及百日同
人言自開新疆以來漢員

賜環之速未有如先生者有紀

恩詩四首記事同人皆贈詩送別二十日抵烏魯木齊六月初六日
抵哈密二十一日抵肅州換車而行七月十三日抵蘭州十六日
次孫宛曾生是月杪抵西安八月十六日抵開封九月初七日抵
里親故話舊幾如隔世因自號更生居士十二月小除夕女紡孫
適江陰繆氏繆婿梓入贅於家是歲得詩九十五首補作伊犁紀
事等詩九十七首雜文十四篇著天山客話二卷紀程二卷外家
紀聞二卷

六年辛酉先生五十六歲在里門自二月以後偕里中耆宿爲壺
之會每逢花辰令節與趙觀察莊宮允通敏徵君宇遠蔣通守
驥昌吳封君端彝陳大令賓蔣表兄廷耀等往還唱酬無間每歲
皆然其於莊大令述祖藏明經鏞堂則時時相與商榷經義屢有
辨證焉五月十三日孫宛曾殤六月避暑焦山定慧寺詩僧慧超
巨超皆從論詩同年會都轉煥遊揚州平山堂數日仍返焦山
七月孫總戎廷璧邀游太湖東西二山遂至消夏灣觀荷十月松
太道李觀察廷敬邀游吳淞江鎮洋汪庶子學金邀游趣園遂自
蘇州徧游婁東諸勝而返是歲得詩二百十九首文三十一篇
七年壬戌先生五十七歲在里門旌德譚君子文居下洋鎮自建洋
川書院延課諸郡生重聘先生主講席遂以二月攜第三子符孫
婿繆梓至洋川與諸生講經談藝每至宵分遠近聞風從游者日
衆四月旋里八月青陽陳明經蔚邀游九華歷天臺東巖諸勝復

游黃山浴朱砂泉重至洋川書院十月旋里十九日蔣宜人卒有
悼亡八首記事作蔣宜人行狀十二月吳江徐待詔達源邀遊黎
里旬餘而返先生自塞外歸尤喜導揚後進每遇世交子弟才藻
過人者輒向名公鉅卿稱道不置同里如劉編修嗣綰莊上舍會
貽黃孝廉載華丁明經履恆陸孝廉繼輅秀才星紫羅孝廉溶等皆
莊秀才綏甲周孝廉儀璋陸上舍鍾高秀才星紫羅孝廉溶等皆
得獎勵之益其專心古學者如劉孝廉逢祿董上舍士錫諸人則
以漢魏諸儒品之其在蘇州松江鎮江徽州寧國池州及浙江東
西諸郡警履所至從游最多每有異才必加獎許其尤邀心賞者
至折輩行相交讀質文字疊疊常盈几案至有數千里轉輾介紹
以求詩文題字者如雲南師大令範袁明經揆四川郭主簿蘭芬
等不可勝計至如羽士緇流素工吟咏者亦欲得一言以爲幸偶
歸里中及所過之地戶履恆滿樽酒過從論文考古動輒移晷先
生不憚其煩也是歲得詩百七十七首文三十五篇著左傳話二
十卷

八年癸亥先生五十八歲在里門正月同年會都轉煥過訪因偕同
里趙觀察翼劉宮贊種之莊宮允通敏舅氏曙齋先生莊庶常訥
男謝庶常翰爲詞館之會留講數日始行二月離政額勒布公聘
主揚州梅花書院因游京口諸山遂至平山堂看梅四月以揚州
講席酬應較繁辭之而歸仍赴洋川書院是月廿八日次孫女生
五月旋里六月至焦山定慧寺避暑旬餘而返八月仍赴洋川書
院十一月自洋川由水程沿江至蕪湖張太守祥雲陳孝廉懿本
留游後湖蟬磯諸勝遂訪孫觀察星衍於江寧月杪旋里偕同里
諸公爲消寒雅集杯酒往還更迭置譚十二月復游上海偕李觀
察廷敬及幕中諸客爲消寒會旬日返里十二日蔣宜人于前
橋先塋昭式復還華仲弟副使君於穆穴先生自營生積戒子孫

母得更華爲詩以記之葬事既畢因至句容茅山徧游青元館華陽岡乾元觀與舊友王司馬周南談燕竟日而返是歲於宅西園小築泉石創瞻華臺更生齋得詩二百九十九首文三十二篇刊竣乾隆府廳州縣圖志五十卷著比雅十二卷

九年甲子先生五十九歲在里門正月率長子鈐孫弭平學使忽於江陰同年邢大令澍邀游長興龍華寺遂泛湖至長興自長興訪王少寇昶於青浦李觀察廷敬復邀游上海徧訪南園吾園及葉氏也是園三月重赴洋川書院四月自洋川至歙縣洪源謁先祠展大同府君之墓五月旋里初七日第五子麟孫生六月送書院諸生至江寧鄉試留居報恩寺精舍匝月八月重游上海李觀察邀同先生及吳祭酒錫麒祝編修堃趙表第懷玉諸人以中秋夜泛月至吳淞江飲宴達旦各有詩紀事十月如皋汪觀察爲霖邀游北園遂偕登狼山絕頂望海訪水繪園故址回塗溯江復至焦山小憩十二月至蘇州游天平支硎諸山久住吾與菴遂往鄧尉香雪海探梅而返是歲得詩二百五十九首文二十一篇

十年乙丑先生六十歲在里門正月自宜興渡太湖至長興偕詩僧巨超游下山遂自湖州至天台徧游天台石梁赤城瓊臺諸勝宿桐柏宮國清寺數日而返三月涇縣李大令傳淦聘修縣志設志局於蕭公祠先生日與縣人趙舍人良齋廣文紹祖左明經煊朱廣文煒等訂定志例酬酢往還無間五月旋里六月重至涇縣志館八月旋里復爲太湖包山之游徧訪石公山林屋洞綠楊灣諸處九月三日爲先生周甲初度長子鈐孫等於里第授經堂稱觴二日初十日第三子符孫娶婦崔氏乾隆辛巳進士分巡湖北荆宜施道永濟崔君龍見之孫乾隆壬子科副榜貢生甘肅兩當知縣景儼之女也十月由京口溯江至星子縣登匡廬絕頂自香爐峯歷石門澗天池佛手巖黃龍澗秀峯寺諸勝回塗重至涇縣是

月七次次孫女殤十二月旋里是歲得詩三百四十三首文二十二篇

十一年丙寅先生六十一歲在里門正月至杭州以元夕泛舟西湖遂至餘杭縣徧游徑山大滌山諸勝宿洞霄宮回舟復至鄧尉看梅二月寧國魯太守銓聘修寧國府志設志局于城北戚氏故居先生以涇縣志事將成命長子鈐孫先往編校自留寧國訂定條例閒訪敬亭南湖之勝四月自寧國至涇縣由水程旋里五月復至寧國七月自寧國至涇縣遂由旌德太平往游黃山浴朱砂泉宿紫雲菴復自縣縣祁門溪行至崇安縣游武夷山徧歷九曲溪及天樞玉女諸峯入桃源紫雲洞自上饒玉山舟行旋里是月四日孫凱會生^{第三子符}二十三日第三子婦崔氏卒八月二十三日孫彪會生^{長子鈐}十月重赴涇縣十一月以涇縣志告成自涇縣至寧國塔橋梓楠江陰縣學生十二月由寧國旋里是歲得詩三百七十七首文二十二篇著六書轉注錄八卷編纂涇縣志三十二卷

十二年丁卯先生六十二歲在里門正月往游金焦二山小憩定慧寺二月舟行至於潛縣游東西天目山宿禪源寺數日而返重赴寧國志局第三子符孫侍行五月旋里避暑焦山定慧寺六月重至寧國是月二十日次女生二十二日側室鄭氏卒七月自寧國至江寧八月嘉興李太守廣芸邀游煙雨樓遂游常熟虞山至嘉興復渡浙江至紹興登北轅山訪快閣天池之勝十月重至寧國十一月以府志告成自寧國旋里是歲常州大旱秋霖復傷稼禾苗不成飢民皇皇城邑尤甚先生首請于將太守榮昌及武進陽湖南明府設局營田廟捐資施賑先生總理局事自捐三百金爲倡餘按城鄉各商賈殷戶酌資勸捐每日卯刻入局瀾下一二十刻始返風雨無間又慮賑賑賑米有疾疫及狼藉粒米之虞於是